

Pregled Dokumenta| Broj 63/06

Početna (/) / Dokumenti (/Docs/) / Službene novine Federacije BiH (/Docs/Drzavni)
/ Dokumenti pregled

Službene novine Federacije BiH, broj 63/06

Na osnovu člana 38. stav 2. Zakona o lovstvu ("Službene novine Federacije BiH", broj 4/06), federalni ministar poljoprivrede, vodoprivrede i šumarstva donosi

PRAVILNIK

O UVJETIMA GOSPODARENJA LOVIŠTIMA

Član 1.

Ovim Pravilnikom propisuju se uvjeti gospodarenja lovištem, način organizovanja lova, vrijeme trajanja lova, kontrola izlovljavanja divljači, naknada za učinjenu štetu lovaca u lovištu, mjere sigurnosti u lovu i način korištenja objekata u lovištima sa kojim gospodari lovačka udruga, privredno društvo šumarstva, te ostala pravna lica registrovana za bavljenje lovstvom koja su na osnovu Zakona o lovstvu i Zakona o koncesijama dobili lovište na gospodarenje (u daljnjem tekstu: korisnik lovišta).

Član 2.

Korisnik lovišta obavezan je ispunjavati sljedeće uvjete:

1. da ima urednu registraciju za obavljanje lova;
2. da je član Lovačkog saveza Herceg Bosne ili Saveza lovačkih organizacija BiH;

3. da u Zakonom predviđenom roku (godina dana, računajući od dana preuzimanja lovišta) donosi lovno-gospodarsku osnovu lovišta kao dugoročni plan gospodarenja, a u skladu sa njom godišnje planove gospodarenja lovištem do 30. aprila, kao i da izvještaj o izvršenju godišnjeg plana podnosi do 31. maja tekuće godine;
4. da izradi program uzgoja divljači kao planski i gospodarski akt kojim se potanko uređuje uzgoj, zaštita, lov i upotreba divljači u uzgajalištima divljači;
5. da osigura finansijska sredstva za provođenje lovno- gospodarske osnove za štete na divljači i lovištu, kao i nadoknadu štete koju čini divljač (osiguranjem kod osiguravajućeg zavoda, pologom kod banke, hipotekom na nekretnine i sl.);
6. da mjerama korištenja lovišta održava normalan kapacitet pojedinih vrsta divljači i time utiče na obim šteta kod drugih privrednih grana na području lovišta;
7. da u gospodarenju lovištem osigura saradnju stručnih lica za planiranje i realizacije stručnih poslova i zakonskih odredbi (član 42. Zakona o lovstvu);
8. da donese i redovno usklađuje sa stanjem na tržištu opšti akt o korištenju lovišta;
9. da osigura provođenje preventivnih dijagnostičkih, kurativnih i higijensko-zdravstvenih mjera u lovištima i ostalim prostorima gdje se divljač uzgaja ili obitava radi zdravstvene zaštite divljači;
10. da vode evidencije o izvršenim radovima i provedenim mjerama u lovištu i izvještavaju nadležne organe o istim, član 50. Zakona o lovstvu;
11. da sredstva ostvarena u gospodarenju lovištem koristi namjenski i u skladu sa članom 51. Zakonu o lovstvu;
12. da organizuje lovočuvarsku službu koja će učinkovito raditi na zaštiti i uzgoju divljači, uređenju lovišta i racionalnom korištenju divljači i lovišta;
13. da organizovanim radom osigurava stručno usavršavanje učesnika gospodarenja lovištem sa ciljem da se pri tome dosljedno poštuju zakonske, stručne i etičke norme;
14. da uredno prati realizaciju dugoročnog i godišnjih planova gospodarenja lovištem prema propisanim evidencijama;
15. da ima stručno mišljenje za korištenje lovišta izdano od strane Saveza kojeg je član;

Provođenje uvjeta iz stava I. ovog člana izvršit će se zaključivanjem ugovora između kantonalnog ministarstva nadležnog za poslove lovstva i organizacije kojoj je lovište dano na gospodarenje.

Član 3.

Gospodarenje lovištem, u smislu ovog Pravilnika, obuhvata:

- Izrada i provođenje lovne osnove i godišnjih planova gospodarenja lovištem;
- Određivanje namjene površina lovišta, površina rezervata i dinamike zaštite staništa i očuvanja divljači, površina za izgradnju stalnih i privremenih prihvatilišta za fazanske piliće, površina za ograđivanje za intenzivni uzgoj krupne divljači i sl.;
- Stalno praćenje brojnosti i "stanja" fondova divljači u lovištu i vođenje lovne evidencije i statistike;
- Praćenje zdravstvenog stanja divljači i saradnja sa veterinarskom službom (dostava uzoraka i obavješ- tavanje u vezi nalaza i sl.), poduzimanje preventivnih i represivnih mjera i dr.;
- Planiranje, organizovanje i realizacija akcija u lovištu;
- Planiranje, organizacija, realizacija i kontrola obilježivanja granica lovišta, granica rezervata, terena za obuku lovačkih pasa, komercijalnih dijelova lovišta, postavljenje, održavanje i zamjena graničnih ploča;
- Planiranje, organizacija, realizacija i kontrola lova za lovce članove udruge;
- Planiranje, organizacija, realizacija i kontrola lova za lovce turiste;
- Organizacija, realizacija i kontrola odstrjela divljači, ocjenjivanje trofeja divljači, izdavanje trofejnih listova i vođenje evidencije;
- Ostale mjere i aktivnosti koje zavise od specifičnih prilika u lovištu, odredaba Zakona, akata Saveza i stanja organizovanosti korisnika lovišta.

Član 4.

Akcije u lovištu su:

1. Akcije obuhvaćene stavom iz finansijskog dijela plana gospodarenja lovištem: "Planirana vrijednost ulože- nog rada i drugih ulaganja lovaca u lovište" i to:
 - Izgradnja lovno-tehničkih objekata (visoke čeke, hranilišta, i sl.);
 - Izgradnja prihvatilišta za fazanske piliće;

- Akcija izgradnje solišta;
- Akcija osiguranja vode u lovištu (pojilišta, bunari, vodotoci i sl.);
- Akcija podizanja remiza, polja za divljač, obrada njiva i sl.;
- Akcija hvatanja žive divljači i puštanje žive divljači u lovište;
- Čuvanje prihvatilišta i karantena za unošenje žive divljači u lovište;
- Ostale akcije prilagođene stvarnim potrebama lovišta;

2. Ostale obavezne akcije u lovištu, i to:

- Proljetno brojanje divljači;
- Akcije smanjenja broja predatora;
- Akcije uništavanja pasa i mačaka koji se po lovištu kreću bez kontrole i odobrenja korisnika lovišta;
- Iznošenje animalne soli;
- Akcija osiguranja hrane za zimsku prihranu divljači;
- Zimsko prihranjivanje divljači;
- Akcija čuvanja lovišta, sudjelovanje u patrolama, pomoć lovočuvarskoj službi;
- Ostale akcije prilagođene stvarnim potrebama lovišta.

Član 5.

Ulovljena ili uginula divljač i njeni dijelovi (trofeji i dr.) pripadaju korisniku lovišta i mogu se koristiti uz naknadu po tržišnim cijenama ulovljene divljači i njenih dijelova (Cjenovnik) korisnika lovišta.

Član 6.

U lovištu, divljač mogu loviti i koristiti njene dijelove:

1. Članovi udruženja;
2. Radnici Stručne službe korisnika lovišta i Saveza;
3. Lovci - turisti;
4. Gosti udruženja i Saveza;

Lica iz tačke 2. i 4. ovog člana koriste ulovljenu divljač i njene dijelove pod istim uvjetima kao i članovi udruženja, s tim što naknadu za ulovljenu divljač može platiti njihov domaćin ili treće lice.

Korisnik lovišta je obavezan da, prilikom organizacije i izvršenja lova sa lovcima turistima (lovni turizam), u potpunosti poštuje lovačku etiku i običaje u lovu.

Radnici Stručne službe kada vrše uzgojno-selektivni i sanitarni odstrjel ne plaćaju naknadu za ulovljenu divljač.

Član 7.

U lovištu se lovi:

1. Uzgojno - selektivnim odstrjelom;
2. Sanitarnim odstrjelom;
3. Redovnim i trofejnim odstrjelom;
4. Hvatanjem žive divljači;
5. Odstrjelom na osnovu čl. 14, 19, 56, 57. i 59. Zakona o lovstvu (lov uz odobrenje);
6. Redukcionim odstrjelom.

Redovni i trofejni odstrjel krupne i sitne divljači vrše lovci-turisti i članovi udruženja, a izuzetno i gosti uz prethodnu odluku Upravnog odbora korisnika lovišta.

Uzgojno-selektivni i sanitarni odstrjel vrše radnici Stručne službe korisnika lovišta i lovci turisti ukoliko za to imaju interes.

Uzgojno-selektivni odstrjel lovci turisti i članovi udruženja vrše uvijek u pratnji radnika stručne službe korisnika lovišta, odnosno lica ovlaštenog od strane Upravnog odbora korisnika lovišta.

Lov upotrebom sokola i drugih ptica grabljivica je dozvoljen u za to lovnom osnovom namijenjenom lovištu ili dijelu lovišta.

Član 8.

Lovci - članovi udruženja mogu loviti divljač u lovištu, kada ispune uvjete utvrđene Zakonom o lovstvu, Statutom Saveza i aktima korisnika lovišta.

Lov i prava iz lova ostvaruju članovi udruženja u lovnom reviru u kojem izvršavaju svoje obaveze po odluci Upravnog odbora i u drugim lovnim revirima lovišta.

Lovci turisti mogu loviti na osnovu ugovora zaključenog između korisnika lovišta i posrednika -turističke agencije ili privrednog društva koje ispunjava uvjete iz Zakona o lovstvu ili neposredno u slučaju da su državljani BiH.

Član 9.

U lovištima se može organizovati pojedinačni i grupni lov, zavisno o vrsti divljači koja se lovi i broju lovaca.

1. Pojedinačnim lovom love se sljedeće vrste divljači: jelen, jelen lopatar, bjelorepi jelen, srna, muflon, divokoza, divlja svinja i medvjed.

Pojedinačni lov se obavlja dočekom na zemlji, dočekom na čeki, vabljenjem, vrebanjem (pretraživanjem), šuljanjem, mamljenjem i zapregom, privozom čamcem bez motornog pogona, pticama grabljivicama, stupicama i klopama, uvijek uz stručnog pratioca.

2. Grupnim (skupnim) lovom se love sljedeće vrste divljači: divlja svinja, zec, fazan, poljska jarebica, jarebica kamenjarka, šumska šljuka, divlja patka, divlja guska, grlica, gugutka, prepelica, liska i druge vrste divljači van režima zaštite.

Grupni lov se obavlja prigonom, pogonom i kružnim lovom.

U grupnom lovu je dozvoljena upotreba lovačkih pasa u skladu sa odredbama Zakona o lovstvu. U grupnom (skupnom) lovu sudjeluju najmanje 3 (tri) lovca.

Divljač izvan režima zaštite se lovi u pojedinačnom i u grupnom lovu.

Član 10.

"Krupna" divljač se lovi na osnovu Dozvole za lov krupne divljači, izdane na propisanom obrascu, a divlja svinja i "sitna" divljač na osnovu Dozvole za lov koja glasi na ime vođe grupe lovaca.

Dozvolu za lov "krupne" divljači izdaje korisnik lovišta (stručni djelatnik -upravnik lovišta po ovlaštenju korisnika lovišta), a dozvolu za lov "sitne" divljači predsjednik organizacionog dijela udruženja (sekcija, društvo, podružnica ili sl.) za lovni revir u kojem svoje aktivnosti ostvaruje organizacioni dio udruženja.

Dozvola za lov se izdaje najmanje 24 sata prije početka lova.

Član 11.

Dozvola za lov se može izdati samo na one vrste divljači koje su predviđene u godišnjem planu gospodarenja lovištem za tekuću lovnu godinu i u planiranom obimu (broju).

Ulovljena divljač i njeni dijelovi mogu se iznijeti iz lovišta samo uz propratnicu-potvrdu koju na propisanom obrascu izdaje pratilac lovca u lovu na krupnu divljač, a vođa grupe lovaca ili lovnik u lovu na divlje svinje i "sitnu" divljač.

Propratnica-potvrda za "sitnu" divljač i divlju svinju može se dati i vođi grupe lovaca za cijelu grupu ako zajedno izlaze iz lovišta ili idu do mjesta stanovanja.

Član 12.

Pratilac lovca i vođa grupe lovaca dužan je u roku od 48 sati, odnosno u roku koji utvrdi Upravni odbor korisnika lovišta, po završetku lova, dostaviti Stručnoj službi korisnika lovišta Zapisnik o izvršenom lovu i Izvještaj o izvršenom lovu na drugoj strani dozvole za lov, odnosno drugom dijelu dozvole za lov sa unesenim svim podacima predviđenim u obrascu.

Grupi lovaca, odnosno lovcu iz grupe lovaca za koju nije dostavljen izvještaj u roku neće se izdati dozvola za lov u sljedećem lovnom danu (nedjelji), a vođa grupe-pratilac čini težu povredu discipline i za nju Upravni odbor korisnika lovišta može tom licu uskratiti pravo vođe grupe-pratioca.

Član 13.

Kalendarom lova se utvrđuju vrste i broj divljači koja se može odstrijeliti u lovištu, datum i vrijeme početka i završetka lova kao i zborna mjesta lovaca.

Lovci članovi udruženja i gosti u lovu u lov polaze sa zbornog mjesta i iz lova se vraćaju na zbornu mjesto.

Zborna mjesta za svaki lovni revir u zavisnosti od broja grupa lovaca utvrđuje Upravni odbor korisnika lovišta najkasnije 15 dana prije početka lovne sezone i sa njim upoznaje sve članove udruženja.

Na zbornom mjestu, pratilac odnosno vođa grupe lovaca, je dužan unijeti imena lovaca koji u lovu sudjeluju u dozvolu za lov i da provjeri ispravnost oružja i opreme za lov, lovnu kartu, člansku kartu, oružni list i dokumente za pse ukoliko se vode u lov.

Obavezno je da upozna lovce sa vrstom divljači koja se lovi, načinom lova, vremenom završetka lova i mjerama sigurnosti kojih su svi lovci dužni se pridržavati.

U lovištu, članovi udruženja mogu loviti lovostajem zaštićenu "sitnu" divljač samo nedjeljom i državnim praznikom, a divlje patke i divlje guske i radnim danima koje odredi Upravni odbor korisnika lovišta.

Lovci koji ne ispunjavaju uvjete iz stava 3. ovog člana i lovci koji su pod uticajem alkohola ne mogu loviti toga dana.

Član 14.

Trofeje odstrijeljene divljači obrađuje Stručna služba korisnika lovišta, a ocjenjuje stručna komisija.

Trofej se može predati lovcu kada je ocijenjen, ocjenjivanje trofeja izvršeno na obrascu ocjenjivačkog lista (čije elemente propisuje Lovački savez), popunjen trofejni list na propisanom obrascu i plaćena vrijednost trofeja po cjenovniku korisnika lovišta.

Lovcu se uz trofej ulovljene divljači obavezno predaje trofejni list, uredno popunjen i ovjeren, potvrda za trofej i račun-uplatnica.

Član 15.

Lovac - član udruženja, naknadu za ulovljenu divljač plaća po izvršenju lova ili u vidu akontacije prigodom uplate članarine.

Uplaćena akontacija za lov divljači obračunava se po završetku sezone lova određene vrste divljači, a najkasnije do donošenja godišnjeg plana gospodarenja lovištem za narednu lovnu godinu.

Naknadu za ulovljenu divljač i korištenje ulovljene divljači i njenih dijelova za lovca člana udruženja može platiti i drugo lice ili privredno društvo (sponzor, poslovni partner i sl.), u kom slučaju Stručna služba korisnika lovišta formira odgovarajuću dokumentaciju i dostavlja informaciju sekciji iz koje je taj lovac.

Član 16.

Akontacija za lov divljači posebno se evidentira u knjigovodstvu i vodi na odvojenoj stavki knjigovodstvenog konta i iskazuje se u godišnjem planu gospodarenja lovištem u dijelu prihodi-rashodi, a na kraju lovne godine obračunava se kao naknada za ulovljenu divljač.

Član 17.

Lovcu - članu udruge koji ne izmiri svoje obveze nastale lovom i korištenjem divljači i njenih dijelova u utvrđenim rokovima prestaje članstvo u udruzi, a potraživanja udruge će naplatiti sudskim putem.

Član 18.

Dužnost organizatora lova je da upozna sve sudionike u lovu sa pravilima sigurnosti u lovu. Pravila sigurnosti u lovu su sljedeća:

1. Divljač je dozvoljeno loviti lovačkim oružjem i lovačkom municijom;
2. Oružjem se mora rukovati oprezno i odgovorno;
3. Prigodom odlaska do mjesta lova, prelaska na drugo mjesto, kratkog prestanka lova, boravka u zatvorenim prostorijama, puške se moraju isprazniti odnosno prelomiti;
4. Puška se puni okrenutih leđa sudionicima lova, tako da se cijev drži koso, usmjerena cijev ima na dolje ili gore;
5. Cijev puške se nikada ne smije uperiti prema drugom lovcu;
6. Nije dozvoljeno pucati na nisko leteću divljač ili na divljač koja se kreće u pravcu drugih lovaca i kada se oni time ugrožavaju;
7. Nije dozvoljeno pucati na vodu, led ili smrznuto zemljište u pravcu drugih lovaca;

8. Prije početka lova svakog lovca upoznati sa mjestima susjednih lovaca i upozoriti ih na zabranu pucanja u određenim pravcima;
9. U grupnom lovu, divljač se ne smije pratiti sa uperenom puškom, sve dok se ne prođe crta postavljenih lovaca;
10. Ubrzač okidanja ("šneler") u grupnom lovu se ne smije koristiti;
11. Nije dozvoljeno divljač osmatrati pomoću optičkog nišana na pušci;
12. Prigodom nošenja oružja ruka se ne smije držati na ustima cijevi ili na okidaču (obarači);
13. Poslije pada puške na zemlju ili u snijeg, odnosno podizanja puške, moraju se pregledati usta cijevi radi otklanjanja eventualnih začepljenja;
14. Mjesto na koje je lovac raspoređen ne smije se napuštati u vrijeme lova bez odobrenja stručnog pratioca ili vođe grupe lovaca do završetka (prigona ili pogona) lova;
15. Prigodom sudjelovanja u kružnom lovu i u prigonu, puška se mora držati u položaju koso dolje ili koso gore;
16. Sudionike u lovu, prekršiioce pravila iz stava 1. i 2. ovog člana, stručni pratilac ili vođa grupe lovaca će isključiti iz lova.

Član 19.

Nije dozvoljen lov divljači:

1. U vrijeme kada je vidljivost znatno smanjena (vidljivost manja od 150 m), lošeg vremena (uslijed magle, jake kiše, snijega, jakog vjetra i sl.), hemijskog, biološkog i radioaktivnog zagađenja, ratnog djelovanja na površinama gdje je ustanovljeno lovište;
2. Noću, dva sata prije izlaska i dva sata poslije zalaska sunca, osim divljih svinja, medvjeda i vuka u noći sa mjesecinom, dočekom sa čeke.
3. Zabranjeno je loviti divljač, osim u svrhu spašavanja, u sljedećim uvjetima:
 - a) kada je ugrožena poplavom;
 - b) kada je ugrožena požarom;
 - c) kada je ugrožena visokim snijegom (visina snijega iznad 40 cm);

d) kada je ugrožena dugotrajnim sušnim razdobljem (razdoblje duže od 60 dana bez kiše).

Zabranjeno je obavljanje lova na pojedine vrste divljači kada lov može ugroziti zdravlje ljudi, stoke, kao i druge životinjske vrste.

Član 20.

Lovostajem zaštićena divljač i divljač izvan režima zaštite može se odstrijeliti samo lovačkim oružjem i lovačkom municijom odgovarajućeg punjenja u skladu sa odredbama Zakona o lovstvu.

Član 21.

Divljač izvan režima zaštite i psi i mačke koji se bez kontrole i bez odobrenja korisnika lovišta kreću po lovištu, love se u organizovanim akcijama i prilikom lova na druge vrste divljači.

Lovac - član udruženja obavezan je svake lovne godine odstrijeliti određen broj divljači izvan režima zaštite i pasa i mačaka koji se kreću lovištem bez kontrole vlasnika ili odobrenja korisnika lovišta i to u vrijednosti koju odredi korisnik lovišta.

Vrijednost pojedinačnog poena utvrđuje Upravni odbor korisnika lovišta i to za svaku lovnu godinu u godišnjem planu gospodarenja lovištem.

Lovac koji ne ispuni obavezu iz stava 2. dužan je istu platiti po utvrđenoj cijeni korisnika lovišta i to do kraja tekuće lovne godine.

Član 22.

Objekte u lovištu u toku izvršenja lova koriste sva lica koja imaju dozvolu za lov izdanu od strane korisnika lovišta ili Saveza, isključivo u funkciji za koju su predviđeni i uz naknadu predviđenu Cjenovnikom koji donosi federalni ministar.

Član 23.

Za svu učinjenu štetu lovaca u lovištu nastalu prilikom lova, odgovoran je korisnik lovišta.

Korisnik lovišta mora nadoknaditi štetu vlasnicima zemljišta, voda i šuma na kojem je šteta nastala, a ima pravo refundiranja isplaćenog iznosa od lovca koji je štetu

pričinio.

Član 24.

Korisnici lovišta su obavezni da, na osnovu ovog Pravilnika, usklade svoje poslovanje sa specifičnim prilikama u lovištima kojim gospodare, u roku od šest mjeseci od dana stupanja na snagu ovoga Pravilnika.

Član 25.

Danom stupanja na snagu ovoga Pravilnika prestaje važiti Uputstvo o uvjetima za gazdovanje lovištem ("Službeni list SRBiH", broj 37/90).

Član 26.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

Broj 01-02-384/06
septembra 2006. godine
Sarajevo

Ministar
Marinko Božić, s. r.

Hvala što ste naš pretplatnik. Koristite pogodnosti koje dobijate pretplatom.

O nama

Adresa

Kontakti

Javno preduzeće Novinsko-
izdavačka organizacija SLUŽBENI
LIST BOSNE I HERCEGOVINE. Sva
prava pridržana. 2014

Džemala Bijedića 39/III
71000 Sarajevo
Bosna i Hercegovina
Email: sllist@sllist.ba
(<mailto:sllist@sllist.ba>)

Centrala

Tel: 033/722-030
Email (<mailto:info@sllist.ba>)

Uredništvo

Tel: 033/722-038
Email (<mailto:urednistvo@sllist.ba>)

Pravna služba

Tel: 033/722-051
Email (<mailto:info@sllist.ba>)

Računovodstvo

Tel: 033/722-045, Fax: 033/722-046
Email
(<mailto:racunovodstvo@sllist.ba>)

Pretplata

Tel: 033/722-054
Email (<mailto:pretplata@sllist.ba>)

Ekspedit

Tel: 033/722-041
Email (<mailto:info@sllist.ba>)

Prodaja

Tel: 033/722-079
Oglasni Email (<mailto:info@sllist.ba>)

odjel

Tel: 033/722-049 i 033/722-050, Fax:
033/722-074
Email (<mailto:oglasi@sllist.ba>)

Tehnički sekretar

Tel: 033/722-061, Fax: 033/722-064

Ured direktora

Tel: 033/722-061

Komercijala

Tel: 033/722-042